




# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IANUARI 2016

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## Feiloa'i Ma Le Alii i le Tafaoata

“...Na te fagua a’u i lea taeao ma  
lea taeao; na te fagua o’u taliga,  
ina ia ou faalogologo e pei o e ua

a’oa’oina.” - Isaia 50:4.

Fai mai le tamaitai na ia tusia le  
tusi Faitau Aso: ‘The Quiet Place’,

le tamaitai o Nancy Leigh  
DeMoss, e matua fiafia lava e avea  
*faaauau itulau e 2*



O se ata o sui usufono o le Fono Tele a le Ekalesia e faia i le masina o Me i tausaga uma.

O le Mafuaaga o le Pese:  
**O God, Our Help  
In Ages Past**

*faaauau itulau e 12*

## Ia I'u Lelei le Tausinioga

“Ua ou tau le taua lelei, ua i’u ia  
te a’u le tausinioga, ua ou taofi i le  
faatuatua. O lenei, ua teuina mo

a’u le pale o le amiotonu, e foa’iina  
mai ia te a’u i lea lava aso e le Alii  
*faaauau itulau e 5*

# Feiloa'i Ma Le Alii i le Tafaoata

*faaauau mai le itulau muamua*  
lana tusi ma mea e feiloai ai le tagata na te faitauina le tusi, ma le Alii, i lea aso ma lea aso, tusa lava pe na o ni nai minute, poo le a foi le taimi o le aso poo le po o loo feiloai atu ai i le Alii. Peitai ua ia fautuaina mai e faapea, o le mea lava ua fai ma ana amio e le suia, o lona feiloai muamua atu lea i le Atua i le tatalo, i taeao uma lava.

Fai mai a ia, o soo se taimi lava o le aso, e lelei i le feiloai atu i le Atua. Peitai, ua faamamafaina mai e le Tusi Paia le uluai feiloai i le Atua, i le taeao. Amata le aso i lau lua feiloa'iga ma le Alii, i le tafa mai o ata o le aso fou.

Fai mai le Salamo e 88:13: "A o a'u, le Alii e, na ou alaga atu ia te oe; e tomua foi la'u tatalo ia te oe i le taeao."

Ae fai mai le Salamo 90:14: "Ia e faamalilie mai ia te i matou i le taeao i lou alofa; ina ia matou alalaga fiafia, ma ia olioli i o matou aso uma."

Sa faapea foi ona fai e lo tatou Alii Faaola, le uluai usu i le taeao e feiloai ma lona Tama. Mareko 1:35: "O le taeao ua ala po ai o ia, ona ulufafo lea o ia ma maliu atu i le mea tuufua, ma talotalo ai."

O uiga ia o le Faaola, sa amio a'i, sa soifua ai, ma ua ia tuu i le tatalo na ia a'oa'o mai ia i tatou, ina ia ta'ita'iina ai aso ta'itasi o lo tatou ola.

Sa masani foi i le 'au matutua i lo tatou atunuu, ona ala po i le tafa o ata, ma fai le lotu taeao a le aiga, ae o le la lava e faapupuu le fanau laititi, ae latou te lagona mai lava upu o pese o usuina, ma oo ina latou taulotoina upu o pese, ma le fati; e pei o le pese e 304:

Ua e alofa tele,  
Lo matou leoleo e,  
I lenei lava aiga,  
Ua matou ala ai nei.  
Sa pei o e ua oti,

Sa taatia uma ai;  
Lenei ua malolosi,  
Ua toe nonofo mai.

Ua faafetai lau pule,  
Lou leoleo mai;  
Lenei ua tuuina atu,  
I matou uma nei.  
E fai ma ua auauna,  
E tautua atu ai,  
I lau lava afioga,  
Lo matou leoleo e.

Ina afio mai ia,  
Tatou faatasi ai,  
I itu aso uma,  
Ma oe, le Leoleo e,  
Ia e faasinoina,  
O mea matou te fai,  
Ae fai ma ou viiga,  
O au auauna nei.

A tatou faitau i upu o a tatou pese lotu taeao, (ae se'i taatia pea isi pese e ese foi lo latou ogaoga ma o'oo'o ifo i lagona o latou uiga), e ese le logomalie! E ma'eu lava o tatou tua'a na latou faaupu i le tatou gagana o tatou lagona i lo tatou va ma lo tatou Alii. Silasila foi i le pese e 305:

Le Tama e, ua ou maua ai,  
O le aso fou lenei,  
O lau meaalofa lea,  
Ia ou tausii ia lelei,  
Na o oe e lelei ai,  
Lenei aso ua aumai.

Ia aunoa ma mea sese,  
Ua lagona lo'u vaivai;  
A o lo'u Faaola oe,  
E te lagolago mai;  
Na o oe e lelei ai,  
Lenei aso ua aumai.

O mea e tutupu ai;  
Mea lelei e fiafia ai,  
Atoa foi ma mea tiga,  
E faatau galue ai,  
Pule oe e lelei ai,  
Lenei aso ua aumai.

Pe fetau ma mailei,  
'Aua ou te faavaivai,  
O oe e faafelavei,  
O oe ou te sao ai,  
Na o oe e lelei ai,  
Lenei aso ua aumai.

E le gata ina manaia ona fati faasolo ia upu, ae o lagona ma talitonuga o loo aumai ai i nei fuaiupu, e maofa ai lava le mafaufau. Ua faalogo soo i nei pese ma peisea'i ua tau le amana'ia ai o latou uiga o'oo'o. Ae a tatou pepese ma mafaufau loloto iai, e matua mata'utia uiga o loo molimoli mai e nei fatuga na fau i la tausaga ua leva e o tatou tua'a.

Ae o le tamaitai o Nancy Leigh DeMoss lea na amata ai le faamatalaga, fai mai a ia o mea na a'oa'oina ai o ia e lona tama, e le gata ina a'oa'oina ai o ia, ae sa vaai foi o ola ai lona tama, o se faifeau.

E le na ona lauga ai lona tama, ae sa ola ai. Na ia matauina le tootuli o lona tama i le taeao, ma tatalo, ma faitau le Tusi Paia. Tusa lava pe o le a le vevesi o le latou aiga, pe lelava foi lona tama, e le mafai ona le tootuli i le taeao ma tatalo. O le mea muamua lava lea e usu iai i lona alafa'i mai i le tafa o ata, o le tootuli, ma tatalo.

Fai mai Nancy, e tele lava ina fetuleni mai le anoano o galuega ma fe'au o le aso, ma faaosoosoina ai o ia e taatia lana lotu taeao se'ia iai se isi taimi o le aso. Ae tu mai pea i ona luma le ata o lona tama o tootuli ifo i ona vae, i lea taeao ma lea taeao ma lea taeao, ma feiloa'i atu i le Alii i le tatalo. O se a'oa'oga tele lea mo ia, ma se faasino ala. Ina ia aua lava ne'i tuua le ala usu i le tafaoata, e feiloa'i ai ma lou Atua i le tatalo. E faamanuiaina ai oe e le Atua, ma manuia ai mea e te fai.

O lou faamasani i le talanoa i le Atua i le tatalo, o le tapu'eina lava lea o lou ola faaleagaga i le finagalo alofa o le Atua. E puipuia ai oe mai mea pi'opi'o o le olaga, E lavea'iina ai foi oe mai aafiaga leaga o le olaga. Faamasani i le tatalo.

---

# O LE LAUGA

Tusi Faitau : Filipi 1 : 12-14

Matua : Filipi 1 : 12

‘Le au uso e, ou te manao ia iloa e outou, o mea na oo ia te a’u, ua iu ina tupu atili ai le talalelei.’

Manatu Autu : E fia faaaogaina le Manatu Autu o le vaiaso lona tolu o le masina lenei o Ianuari 2016, e pei ona faailoa mai e le Tusi Faitau Aso.

## ‘FAITAUGA I LE TUSI IA FILIPI’

Talu ai ona e le o matua manino mai se vaega o le tusi a Filipi e feagai tonu ma le manatu autu lenei, e foliga mai o loo tatala mai e le manatu autu le avanoa i le au faitau Tusi Paia e faitau ai le tusi atoa ma filifili ai se faitauga mai le tusi, e talafeagai lelei e taosoina ai le faigamalaga a le Ekalesia i lenei tausaga fou 2016.

O le upu moni, e taua upu uma ma faitauga eseese o loo tusia i le tusi. A e mo a’u lava ia, ua ou filifilia le Mataupu Muamua o le Tusi ma le Faitauga o loo i le fuaiupu e 12 se ia oo i le fuaiupu e 14, e aumai ai se feau mo i tatou uma ma le malaga a le Ekalesia i lenei tausaga fou.

O le fesili. Ua mafua i se a ona ou filifilia o le faitauga lea? O le a sona taua?

O le tali. O foliga moni ia o le Tautua Matavela e ao ona faia mo le Atua ma lana Galuega.

Le aposetolo sa fia ‘ai, sa fia inu i le galuega tala’i sa tataua ona manao mai i ni mea e ola ai. Le aposetolo sa mativa, sa noanoatia, sa tulia ese ma sunako ma moe i fafo i le malulu o le po, sa tataua

ona manao mai i se mea e malolo i ai.

Peitai, e leai, e le o mea ia sa manatu i ai le aposetolo i le galuega, a o si ona manao lava e tasi e pei ona ta’ua i upu ia ua fai ma matua : ‘Le au uso e, ou te manao ia iloa e outou, o mea na oo ia te a’u, ua iu ina tupu atili ai le talalelei.’

Le aposetolo o loo atugalua i le talalelei ina nei mativa talu ni ona manao. Le talalelei ina nei tau saili se mea e to’a i ai, talu lona vaai ifo a ua le vaai a’e.

A o le mea lea e fai mai ai nisi o le ausuesue o le Tusi Paia, o le tusi lea a Filipi o se tusi e faa-ositaulaga ona tusi.

O le a lona uiga? O Paulo lava latou o le Iutaia aouliuli e masani lana vaai i le fata faitaulaga ma lona uiga, o le fata na fau e le Atua e fesaga’i ai le tagata agasala ma lona lava mamalu silisili ese.

Pe a alu a’e le tagata agasala i le fata faitaulaga, e alu a’e ma le loto faafetai ma mea sa faapolopolo e ona lima e fai ai lana taulaga ma talialo ai le manatu mai o le Atua i le tagata ua oti ina ia ola.

O se mea e manatu Paulo e le fesiligia mea e ave i le fata aua ua lagona e le loto le taua o le alofa ma le faaeaea a le Atua i lana tagata na fai, ina ua ia ava’e le tagata i le maualuga o le fesaga’iga ma ia e faavavau, o lea ua ola.

A o le a? O loo to manatu le aposetolo i le fata faitaulaga i le Feagaiga Tuai na matua iloga ona mativa masaesae talu manao o le nuu o le Atua ma ona tagata.

A o le ala lea o le tulai atu o Mose

ma toe fautuaina lava le nuu a o sauni e sopoia le Ioritana mo Kanana : ‘Pe a outou o a’e i le nuu folafolaina ma outou toto ni mea e tou te ola ai, ia outou manatua e tou te fu’e ato uluai fua o a outou galuega e tou te o a’e ma outou i le fata faitaulaga e osi ai le taulaga i lo outou Atua.’

Ia, o a uluai fua? Tala masani i mea na tutupu i le fata faitaulaga lea, e auau a ni mea e ave ma le Atua a e fai ma le nuu le lelei o a latou galuega.

Lea e tautala ai le perofeta o Esekielu i taulaga a le nuu ma le leaga sa faia e ositaulaga o le fai mo latou le lelei o manu ua ofoina atu, a e ave ni nai momoi mea o totoe e fai ai le taulaga i le Atua.

Lea foi e alaga ai ma le leo tele le perofeta o Mika i le seneturi e valu, o le seneturi ou te faaigoaina e a’u o le seneturi o manao: ‘E tatou te o a’e ea ma ni a i luma o le Alii?’

Le tautua a le nuu ua faasili o latou manao ma oo ina le popole ai i le fata faitaulaga ma le tautua o loo faia.

A o le manulauti lea o le tautua a le aposetolo o Paulo na le manatu ifo ai mo sona lelei, a e sei tali le manao o le talalelei, ia papatisoina ma faatalaleleiina le lalolagi i le maliu ma le toetu manumalo o Keriso.

A o le taua lea o le faamanatu atu e Paulo i le Ekalesia i Filipi o mea na oo ia te ia a o i ai ma Sila i le falepuipui i Filipi, aua o le faailoga lea o le tagata o loo matau i le talalelei, e le o se isi lava mea a o le talalelei, e fia maua se ‘ai e alu a’e ma ia i le fata faitaulaga ma le talalelei a faaaauu itulau e sosoo ai

---

# O LE LAUGA

Keriso.

Tala masani i mea na oo ia Paulo ma Sila i le falepuipui i Filipi, fai mai le molimau a Luka i le tusi o Galuega a le au aposetolo, na lulu le mafuie tele ma matala ai faitotoa o le falepuipui ma noataga o Paulo ma Sila, o le avanoa sa tataua ona sosola ese ai, peitai e lei mafai ona sosola ese.

O le uiga lea e pei ona iloa i le iuga o le tala, ina ua tago ifo le leoleo o le falepuipui i le pelu o le a pule i lona ola ona o le manatu ua sosola ese pagota, a e te'i i le valaau atu o Paulo : 'Aua e te faia o lona mea ia te oe, o lea lava e matou te iinei.'

O le 'ai lea sa fia maua e Paulo mo le fata faitaulaga ma le talalelei, ina ua fai mai le leoleo o le falepuipui ia Paulo : 'Se a se mea ou te faia e faaolaina ai a'u?'

Papatisoina le leoleo o le falepuipui ma lona aiga atoa, ua na valaauina foi ia Paulo ma Sila e latou te fai'aiga i lona fale.

O le a? O mea na oo ia Paulo i Filipi : 'Le au uso e, ou te manao ia outou iloa, ua iu ina tupu atili ai le talalelei.'

Le tautua matavela e ao ona faia mo le Atua ma le Galuega, e le o tatou manao a o le manao o le talalelei. E le o lo tatou ola a o le talalelei, aua ua uma ona tapena e le talalelei le ola e ala i

le satauro, e faitau ola le talalelei mo le au faatuatua ma le au tautua i le fata faitaulaga, e tatou te fiu e tufi le ola e pei o la a le Alii o le ola, 'Na ou sau ina ia outou maua le ola ma outou maua atili ai lava.'

Tama e o le Ekalesia, le Ekalesia aao ma le au galulue o loo tutu i le fata faitaulaga e tautua le galuega a le Atua, faatasi ma i latou uma e mafai ona maua le avanoa e faitau ai i lenei feau a le Talalelei, o le upu moni, e le itiiti feau ma galuega o le a feagai ma i tatou i lenei tausaga fou.

Lau Iupeli Tapuai ma lau Ioane Viliamu o loo galueaina i le taimi nei faatasi ai ma le tele o galuega e tataua ona faataunuuina, o ni galuega tetele nei galuega e mafai ona tautevateva ai le faatuatua ma faatupuina ai le musua o le tautua.

O le fautuaga a le talalelei ma lana feau mo lenei uluai masina o lenei tausaga fou, silasila i le fata faitaulaga ma le talalelei ina nei mativa i ni o tatou manao, a ia fai o tatou maosiosia i le galuega e iu ina tupu atili ai le talalelei.

Le ekalesia e, e le faigofie, a e tali loa o tatou manao, tatou faitio loa, tatou manatu ifo loa ua tele le malosia ua alu, tatou tutu loa i luga ma o ese atu ma le faanoanoa. A o le a ea se isi mea e sili ona faafiafia ma faamafanafana mai ina ua aoga

lo tatou ola mo le talalelei?

Fai mai Paulo i ana upu sa fai i faifeau o le Ekalesia i Efeso : 'A ou te le manatua se tasi mea, o lo'u lava ola foi ou te le naunau i ai, se'i ou faauma lo'u momo'e ma le olioli, atoa ma le faiva ua ou maua mai le Alii o Iesu, ou te molitino atu le tala lelei o le alofa tunoa o le Atua.'

O upu a le tagata ua inu ma e o loo inu i le suamalie o le talalelei, o le foai atu o le ola mo le talalelei, o le faailoga o le le mafai ona toe te'a ese ma le suamalie lea e fia inu ai pea e oo atu lava i le faavavau.

Le Ekalesia e, se a se isi mea e sili atu na i lo le talalelei ua ia te i tatou? Foai lou soifua ma lo'u ola mo galuega tetele a le Ekalesia i lenei tausaga.

Ia Manuia Galuega o le a feagai ma le Ekalesia i lenei tausaga fou. Ia manuia lau tautua i le fata faitaulaga ma le talalelei.

Amene.

**Saunia**

**Josefa Momoli Papalii FS  
EFKS Long Beach Muamua,  
Kalefonia.**

**Matagaluega Amerika**

**I le atunuu o Tibet i Asia,  
o se tu faaaloalo le faaeto  
o lou laulau i ni malo.**

**O le pese aupito sili ona  
alumia ona faatauina e  
tagata e oo mai i le aso, o  
le pese "White Christ-  
mas" na usuina e Bing  
Crosby i le tausaga e 1942**

---

# Ia I'u Lelei le Tausinioga

mai le itulau muamua le faamasino amiotonu; e le gata fo'i ia te a'u, a o i latou uma lava o e fiafia i lona faaali mai.”

2 Timoteo 4:7-8.

O Paulo, o le tagata tatou te faaa'oa'o iai mo ni tini lelei. (Paul, our role model for finishing well). Na i'u lelei le galuega na fai e Paulo. Soo se soo lava o Iesu Keriso, e tataua ona tausinioga ina ia faai'u lelei soo se mea latou te tausini iai. O Paulo o le faaa'oa'o mo tatou uma. E ui lava e le taitai ona tatou ausia matati'a o mea na fai e Paulo, ae ou te talitonu e tatou te manana'o uma lava, o tatou Kerisiano, ina ia tatou maua le faatuatua ma le faamaoni sa ia Paulo. O lona i'uga manumalo e matua faamalieina ai le au Kerisiano o e lolofi atu i le Tala

Lelei ia Keriso Iesu.

E mafai ona tatou vaavaai atu faale-maufaufau i le tau faai'ui'uga o le ola o Paulo na tuuina atu mo Keriso, ma femalagaa'i solo ai i le Metiterani, e le o se turisi, a o se fai evagelia itagia ma sauaina o le Tala Lelei ia Iesu Keriso, na sauaina faalausosoo, ma faamaina ma ta'uvalea ai i mea sa masani ona ola a'e ai. Na ia tusia le lua o vaetolu o tusi a le 'au aposetolo o iai i le Feagaiga Fou. Ua faafia ona sao mai le oti.

Ua taunuu o ia i le tauafiafi o lona soifua, ona ia tusia lea o upu nei a o faatalitali i le vavae'eseina o lona ulu e Kaisara: “Ua ou tau le taua lelei, ua i'u ia te a'u le tausinioga, ua ou taofi i le faatuatua.”

Ioe! E tataua lava ona avea Paulo

ma faaa'oa'o ia i tatou o e mulimuli ia Iesu Keriso ma lana Tala Lelei.

O le i'u lelei, poo le le i'u lelei, e faalagolago lea i le tulaga o iai lou ola faaleagaga i le taimi e te oti ai.

Na faamatala e Iesu se tala i tagata e to'alua na oti tusa o le taimi e tasi. O le isi, o le tagata mau'oa e le iloa le igoa. A o le isi o le tagata mativa 'aisi e igoa ia Lasaro. O ai na i'u lelei? O le tagata mativa ma le 'aisi. Lasaro! E leai ni tala se tele i nusipepa a le lalolagi pe a oti se Lasaro. E leai ni lauga e lau ni matati'a tetele na ausia e Lasaro i lona olaga pe a oo ina oti - pe afai fo'i e iai se lotu o sona oti. E leai ni ana oloa i lona olaga i le lalolagi. Ae na alu i le lagi ina ua oti. Afai ua e sauni e lua te feiloa'i ma le Atua pe a e oti, o lona uiga o le i'uga lelei lea mo oe.

faaauau itulau e 6

---

## O le Aufaafofoga Toatasi (An Audience of One)

“Ia nofo le afioga a Keriso i totonu ia te outou ia tele lava, a o outou a'oa'o ma apoapoa'i le tasi i le tasi i le potou uma lava, a o outou pepese foi i salamo, ma pese, ma siva faaleagaga, ma le faafetai i le Atua i o outou lotu.” - Kolose 3:16.

O le mea lava ua tupu i le lalolagi o loo tatou iai, o lo tatou fia faalogologo lea i faafiafiaga e fai e isi tagata - siva, pese, faleaitu, sasa, faataupati, ailao afi. E alu foi le taavale ae e te tago i le ki le leitio, ma e faalogologo i pese o usuina mai ai e isi tagata.

E le faapea o se mea leaga. Peitai, aua le avea lea ma mea e tapunia ai le faitotoa o lo tatou pepese foi o tatou ma fiafia. 'Aua

le avea oe na o se tagata faalogologo, a ia avea foi oe o se tagata e siva ma pese, aemaise i viiga o le Atua. Ou te ofo lava pe a ou vaai i nisi o le potopotoga, na ona nonofo lava, ae le pepese, a ua tuu pese e usuina e le aufaipese, ma isi, ae na o le nofonofo lava o latou e le pepese. O le fesili, e le fia vivii latou i le Atua? Mata e le pepese leo tetele pe ana faapea e iai le Atua i le tino? Ma o pese, o viiga i le Atua. E le fia vivii la latou i le Atua e mafua ai ona le pepese?

O le tausaga e 1973 na ou iai i New Dheli le laumua o Initia. Na ou malaga ma le tuatusi o le aulotu Kerisiano, fai mai e i le pito lava o

se alatele umi e ta'ua o le Ambassador Road. Fai mai o le ala lea o loo iai le tele o ofisa o amapasa o malo o le lalolagi o iai o latou sui i Initia. Fai mai le faasinoga o au, savali, e te le'i oo atu i le Bible Bhavan (o le Fale o le Tusi Paia), ae te faalogoina le alalaga o le aulotu i viiga o le Atua.

Ma e moni lava. Na ou faalogo atu o pepese leo tetele tagata i le pese lauiloa, *Blessed Assurance, Jesus Is Mine!* Na ou ulufale ma ou vaaia ai, e leai ma se isi e le o siva ma pese. Na sau se isi ma ta'ita'i atu au i totonu, ma matou pepese ma sisiva faatasi ai.

Manatua, o tatou uma lava o e talitonu ma faatuatua i le faaolataga na faia e Iesu Keriso, o tagata o le aufaipese, e vivii ma pepese i le o faafofoga ma silasila mai, i lana faapotopotoga e na o ia lava. O ia o le taunuuga o pese ma faaneetaga o tatou faia.

Afemata T. Apelu Aiavao

---

# Talofa e ia Peteru!

Ua tali mai Peteru ia te ia, “Le Alii e, afai o oe, ia e fetalai mai ia te au, ou te alu atu ia te oe i luga o le vai.” Ona fetalai atu ai lea o ia, “Ina sau ia.” Ona alu ifo ai lea o Peteru nai le vaa, ua savali i luga o le vai e alu ia Iesu. Ua vaai o ia i le matagi ua tetele, ona fefe ai lea; ona afua ai lea ona goto, ua alaga mai, “Alii e, faaola mai!” Ona aapa atu loa lea e Iesu lona aao, ua tago ia te ia, ua faapea atu ia te ia, “O oe na, le faatuatua itiiti, se a le mea ua e masalosalo vale ai?” Ona la o ae lea i le vaa, ona malu ai lea o le matagi. (Mataio 14:28-32).

O le tala leni ua faaali manino ai le to’ilalo o le tagata, to’ilalo popo. Oi! ae moni o se to’ilalo? Ae faapefea o lea na laa, lea na savali i luga o le vai, faato’a goto ifo ai. Ae na amata ona savali, ma mafai ona savali, faato’a goto ifo ai lea. O le mea na mana’o iai Peteru, ia savali i luga o le vai. “Le Alii e, afai o oe, ia e fetalai mai ia te au, ou te alu atu ia te oe i luga o le vai.” O lona uiga, ua fia savali Peteru i luga o le vai e pei ona savali ai Iesu. Ua na mautinoa e mafai e le tagata ona savali i luga o le vai. O le tali a Iesu i lona

mana’o, “Ina sau ia!” Laa loa! A o le vai le mea e le o se eleee matutu! A ua laa iai, ona e vaai atu o le la e fai e Iesu. A mafai e Iesu e tatau foi ona ia mafai. Laa loa! Ua savali! Savali i luga o le vai.

Ae ina ua vaai atu i le matagi ua tetele, ona fefe ai lea, ma amata goto ifo ai i le sami loloto.

“Auoi ta fia ola!” - “Alii e, faaola mai!” Faato’a goto Peteru ina ua fefe i le matagi ma galu, a ua le manatu i le Alii lea na fetalai mai, “Ina sau ia!” Savali mai!

O tagata toilalo moni lava i lea taimi, o soo ia sa i le vaa, ua nofonono ai lava a ua le fai le mea lea ua fai e Peteru, o le tu atu i luga ma savali i luga o le sami. Aua ua vaai atu i lona Alii o ia faia, savali loa!

O le a’oa’oga mo tatou, a fetalai mai lava le Alii i le mea e fai, fai loa. Aua tatou te toe masalosalo i le Alii. O ia lava e ona le suasami ma le sami loloto. O ia e pule i matagi.

O le tala o fagogo a loomatutua sa ta faalogo iai a o ta laitiii, fai mai, o le fale o le la e nofo ai le purinise lalelei lalelei lava, e

leoleo e manu fe’ai le ala e ui atu ai. O le taimi lava e te vaai ai i le itu taumatau poo le agavale, e ‘ai ai oe e manu. O le mea lena na le ola ai isi perenise na taumafai muamua iai. Ae a e savali sa’o lava ma aua e te vaai i le taumatau poo le agavale, ua e sao i le purinise.

Ma o le mea lena na fai e le isi perenise, ma taunuu ai i le maota, ma la feiloa’i fiafia ma le purinise, ma oo ina la nonofo.

Toilalo popo lava Peteru i lona faafiti lea na te le iloa le Alii, i le taimi o lona sauaina a o aga atu i le satauro. Ae na avea lona toilalo lena, ma lona toilalo ina ua goto ifo i le vai, na fai ma mea e a’oa’oina ai o ia, ma salamo ai, ma filifilia ai e lona Alii e fai ma ta’ita’i o ni faifaiva se toa sefulu ma le lua e le’i a’o’oga i ni kolisi faafaifeau, na latou atofulu amioga a le lalolagi, ia latou mau na o atu ma latou i le lalolagi faapaupau, “.....ia e alofa atu i le lua te tuaoi e pei o oe lava ia te oe.” O a ni mea o e faia e iloa ai lou alofa ia te oe? Fai la mea na i isi tagata. O le finagalo lena o le Alii Faaola.

O le Ekalesia Kerisiano o le Ekalesia faaola tagata ae le fasioti tagata. O le Ekalesia Kerisiano o le Ekalesia lavea’i ae le tuulafoa’i.

---

## Ia I’u Lelei le Tausinioga

mai le itulau e 5

A o le tagata mau’oa, se anoano o ana oloa i le lalolagi! E matua tumu nusipepa i ni ona tala pe a oti. E fai sona pusa maliu taugata, ma ni ona viiviiga i molimau e fai i sona sauniga lotu e matua tumu i tagata taua ma le ta’uta’ua o le nuu ma le atunuu, poo le lalolagi foi.

O le tagata mau’oa na te le’i maua se i’uga lelei. Sa logologoa lona igoa i le lalolagi, ae le amana’ia i le lagi. E fiu le lagi e su’e le ‘api e le maua ai sona igoa.

‘A ‘e fia maua se i’uga lelei,

faaa’oa’o i le tagata mativa lea na sao i le lagi. Manatua, e iai le igoa o le tagata - o Lasalo. Ua fetalai Iesu ina ia tatou olioli ona ua tusia o tatou “igoa” i le lagi (Luka 10:20: “.....a ia olioli ona ua tusia o outou igoa i le lagi.”)

‘A ‘e mautinoa ua faaolaina oe, o le amataga lava lea o le faai’uga lelei. O le i’uga lava o le tagata i leni lalolagi, o le oti. O lona uiga ua uma lona iai i le lalolagi. Ua leai sona ola. Ua oti. Ua i’u! Ma e oti tagata uma.

O le Eperu 9:27 o loo iai le upu

e tatau ona tatou matauina lelei; o le upu “tasi” - “Pei ona tofia foi mo tagata ia “tasi” lo latou oti...” O se upu e faamanatu mai ai e na o le *tasi lava lo tatou ola*. Le ola lea o loo tatou ola ai. E tasi lava lou tino, le tino na e fanau mai ma oe. E tasi lou mafaufau; e tasi lou ola. E leai se isi ola i tua atu o le oti. O le mea lena e tatau ai ona e i’u lelei; oti lelei. Ma o le faaiuga e matua lelei, poo le ola i’u lelei, o le faaolataga lea ua e maua ia Keriso. O le faaolataga e maua mai le alofa tunoa o le Atua; o lana meaalofa mo tagata e faatuatua ma talitonu i le maliu o lona Alo i le satauro. Tusa lava pe faato’a faaaau itulaue 10

---

# IOANE KALAVINI

## O LE APOSETOLO A'OA'O ATU

**1509 - 1564**

**O le Tofi Muamua: Faifeau**  
*(faauau mai le Sulu o Tesema)*

E tatau i faifeau ona fai fono ta'i vaiaso mo le faatupuina o le Ekalesia, talanoa i mataupu i le Tusi Paia, ma fo'ia ni faafitauli o loo iai. A iai ni mataupu e le mafai ona fo'ia e faifeau, ona talo lea o se fono ma toea'ina e faia ai se faaiuga o mataupu o eseese ai.

Sa mana'omia foi le auai o faifeau i fono ta'i kuata o le tausaga, e tofia ai nisi i tulaga tofi o le galuega. O ia fonotaga e faamuamua ai lava le talanoaina o pulega o le galuega, totoi, ma ni mataupu tau i le amio. O lea fono sa ta'ua o le Fono Sili, ma sa faia ina ia suesue ai foi poo iai ni faiga le manuia o tula'i mai i aulotu fou.

O sui o lenei Fono Sili na lauiloa mulimuli ane o nisi e matua malosi le latou pule i le lalolagi. Mai lea vaega na faatuina ai se isi vaega mo misionare, lea sa ia auina atu misionare o le Toe Fuata'iga i Italia, Siamani, Sikotilani, Farani ma Egelani, ma isi atunuu i fafo atu o Europa. I ia vai taimi, e le'i faigofie le auina atu o misionare, ona o le toatele o latou na fasiotia i le taimi lava e taunuu atu ai i se atunuu. O nisi o misionare a Kalavini mo Amerika i Saute na fasiotia lava i le vasa a o le'i taunuu i atunuu na faamoemoe e malaga i ai. O le ala lea na mafua ai ona fai faalilolilo tapuaiga a le 'au Toe Fuata'iga i fale e teu ai meaa i manu, i laolao i le vao, pe fai foi i totonu o ni ana tuufua.

O le A'oga a Kalavini o le uluai a'oga lea na faatuina mo le sauniunia o misionare e auina atu i le lalolagi, ma le feau o le Toe Fuata'iga o le Ekalesia ma faafo'i i le mea na iai i le amataga. O le vaega lea tatou te iloa ai le galue o

Kalavini i le faataunuuina o le faauuga faa-aposetolo. O le nofoaga o le faauuga faa-aposetolo ua avea nei ma nofoaga autu, lea na salalau mai ai ituaiga misionare eseese i le lalolagi atoa. Na a'oa'oina misionare i lea nofoaga ina ia latou mafai ona faatuina le Ekalesia i nuu e tete'e i le Tala Lelei, ma ia mafai ona galulue i nuu ua faauama'a'aina e le tiapolo, ae le gata i lea o tu ma aga a tagata o le atunuu, poo ni faiga pi'opi'o foi a le lotu. Ia taumafai misionare e suia mea o loo iai, ina ia mafai e tagata ona ola manuia i le Upu ma le Agaga.

O taumafaiga ia sa a'oa'oina i le A'oga a Kalavini. Na a'oa'o e ia le ola ma le mana o le Upu. Na ia faafaileleina foi i latou ina ia latou faatuatua ma tumau i le Upu, ma o le toatele o i latou na malilili ai lava i le misiona na latou malaga ai. Na ia faatupu i o latou lotu le misiona ma le fuafuaga e faataunuu ai le toe fausia o mea i nuu ua faasino mai e le Alii e o iai.

Ua tupu tele le faa-Kalavini ma ua sili atu ona faamautuina i lo le faa-Luteru. Aisea? Ona o le tomai ma le tofa loloto sa iai ia Kalavini. O Luteru sa ia faasalalauina ona talitonuga i upu tusitusia, felafolafoa'iga faitele, ma mafutaga tetele lea sa atili faaosoina ai le faatuatua o tagata. A o Kalavini, sa ia fuafua ma faataatia ma le faaeteete le a'oa'oina o mataupu silisili, ma faaali atu le mafuaaga e tatau ai ona fai, faailoa ai le uiga moni o le taunuu e oo iai le au faatuatua, ona iloilo lea ta'i tasi laasaga uma o se a'oa'oga. O ona tomai faa-aposetolo na faamautuina ai se faavae malosi i ana tagata a'oga, na avea ma mafuaaga o le matua

malosi o lo latou faatuatua.

**O le Tofi Lonalua: o le Faiaoga**

Sa ta'u foi faiaoga o foma'i, ma e sa filifili mai latou mai se vaega o faifeau. Sa tuuina atu ia i latou le tausiga o le Upu ina ia sa'o lelei ma leai se faaletonu o le faauigaina, ma ia filifilia foi ni faifeau ua faaau'upegaina lelei e a'oa'oina vaega eseese o polokalame a le a'oga. O le galuega muamua lava a faiaoga o le aoaoina o le mataupu silisili, ma ia popoto i gagana ma mea faasaaienisi. O le mea lea, o aulotu fou, ia fai ni a latou a'oga e a'oa'oina ai le gagana Eperu ma le gagana Eleni, faaopoopo atu iai ma mataupu tau i le Tusi Paia. Ona o tu ma aga i ia vai taimi, sa ese ai le aoga mo teine. O le a'oga lea na faatuina e Kalavini sa ta'ua o le A'oga a Sineva. Na tofia iai le tagata Farani o Theodore Beza e pule ai. Mulimuli ane na avea ai lenei tagata ma uo mamae a Kalavini. O aoga mo tagata matutua sa faia i Aso Gafua, Aso Lulu ma Aso Faraile. Na faia ia a'oga e faamalamalamaina ai uiga moni o mataupu mai le Tusi Paia, ma faaau'upegaina ai foi i latou e ono avea ma faifeau.

**O le Tofi Lona Tolu: Toeaina**

O Toeaina sa filifilia e faavae i luga o a latou amio, amio lelei, lauiloa i le latou tofa, faatuatua, ma o ni tagata e faigata ona tosina i ni tosoa'iga a le agasala ma le fai mea pi'opi'o. E tofia mai i latou e faauluuluga o le vaega o faifeau, ma tuuina atu iai le tiute o le va'ia lea o le amio lelei ma le olaga faaleagaga o tagata i totonu o faaauau itulau e sosoo ai

---

# IOANE KALAVINI

## O LE APOSETOLO A'OA'O ATU

aulotu. E tofua le aulotu ma le toeaina, pe toalua foi. O latou ia latou te vaaia le amio ma le ola faaleagaga o tagata ma aiga o le aulotu. Alatau matauina ni amioga e faaletonu, o le latou tiute le fautua ma faatonu, ma ta'ita'iina mai i le loto salamo mai le amio le tatau ua fai. Latou te logoina foi le fono pe afai lava e le salamo le tagata. Afai lava e tumau pea le le salamo o le tagata ma le suia lana amio, ona pa'u loa lea o lea tagata ma le Ekalesia ma tumau ai se'ia oo ina salamo.

O le tiute muamua lava o toeaina e pei ona tusia i le Eperu 3:13, o le fautuaina malosi lea o tagata i aso uma, ma uuna'ia i latou e fai galuega lelei ma uiga faaleagaga o mea e malie i le silafaga a le Atua.

### O le Tofi Lona Fa: Tiakono

E faavae lenei tofi i luga o le faavae o tuuina mai e le 1 Timoteo 3, lea ua filifilia ai tiakono e galulue i le vaaia lea o mea tau tupe a le aulotu, poo le vaaia lea o le olaga lautele o le au faatuatua i le siosiomaga o latou iai.

Sa manatu faamaualuga lava le aai o Sineva ma fai mai e leai ni o latou tagata 'aisi, pe ni tagata o maua i ni ma'i ae le o togafitia ma tausia lelei. O tiakono ta'itasi uma lava e fai lana komiti faafalema'i mo le vaega o le nuu na te tausia. A ma'i se isi o le aulotu, e filifili e tiakono le foma'i e mana'o na te vaaia le ma'i, ona asiasi lea iai i le fale le foma'i, pe faatonu foi e momoli atu i le falema'i e fai ai le suesuega. Na fai lea fuafuaga faatatau mo tagata matitiva o Sineva. O lea faiga na iloa ai lava le taua i le aai o Sineva o le ola maloloina lelei o ona tagata, ona na latou maua se tausiga faafoma'i

ma faaleagaga matua lelei lava, ma lauiloa ai Sineva o le aai o le Tala Lelei moni.

### O Mea Aoga na Tatou Maua mai ia Kalavini

E tele mea na amataina e Kalavini mo le Ekalesia e le'i faalogo lava iai o faia i lea vai taimi. E le taumate o le a e maofa pe a e silafia o nisi o mea o loo faia nei e le Ekalesia ma tatou faaaogaina ma mulimuli ai, o Kalavini lava na ia ulua'i amataina.

1. Na ia amata faatalatalanoaga tau i ni faafitauli tau le tagata, e mulimulita'i i le faasinoga a le Afioga a le Atua.

2. Na ia faatulaga le faamaopoopoina o le galuega a le faifeau, e aofia ai le laugaina o le Upu.

3. Na ia faatulaga lelei le galuega a le faiaoga, lea na auiliili ai mataupu taua o le Tala Lelei, ina ia malamalama lelei ai tagata uma, tamaiti seia oo i tagata matutua.

4. Na ia faatulaga lelei foi itu uma e mana'omia mo le galuega a toeaina ma tiakono.

5. Na ia amata le tapua'i faatasi faa-faapotopotoga ina ia mafai ai e le tagata ona oo atu i le Atua e ala i viiga.

6. Na ia faaaogaina le gagana Eleni o loo tusia mai ai le Feagaiga Fou, ina ia malamalama ai tagata i uiga sa'o ma le moni o le Upu.

7. Na ia faaaogaina le gagana Eperu mo le faaliliuina sa'o o le Feagaiga Tuai. E oo mai i le taimi lea, na o tagata Iutaia lava na latou faaaogaina le gagana Eperu mo so latou malamalamaaga tau i le Atua.

8. Na ia toe amataina le galuega mo faifeau, o le tatalo lea mo tagata mama'i, pe afai latou te lagona ua tatau ai.

E tele nisi itu o le galuega na tapena lelei e Kalavini, ae ua na o nisi ia o mea e sili ona taua ua lauina atu. Ma o le a e malamalama ai i le aoga o ia mea e iloa ai mea sese sa faia e le Ekalesia Katoliko e ta'ita'i seseina ai tagata.

### O le Faaleagaina o Lona Tagata ma Lana Amio

E ui lava e foliga mai ua solosolo lelei mea uma, ae iai lava mea o loo faaletonu. A o taumafai Kalavini e amatalia lana lava vaega o le galuega o le Tala Lelei i Sineva, ae sa tumau pea ona faalavelave le malo, e aofai ai le tapu'eina o tagata ma saisaitia mo ni sala e aunoa ma le logoina o toeaina. Sa mana'o lava le malo e lagolagoina le lotu, peitai e le'i manino lelei le fesoota'iga o tulafono faale-malo ma mea tau pulega.

Na matua mafatia foi le olaga o Kalavini i lea vai taimi. I le tausaga e 1542, i lona uluai tau malulu i Sineva, na fanau ai lona toalua o Iteleti o se tama, e lua vaiaso ae oti le tamaitiiti. Na matua faanoanoa ai lava Kalavini ma Iteleti. E tolu tausaga ae toe fanau Iteleti, oti lana tama. Na toe fanau foi Iteleti i le 1547, na oti foi le tamaitiiti. Na faaaoga e fili o Kalavini mea ia e fai ma auala e sao ai ni a latou faitioga ia Kalavini. Fai mai i latou o le le ola o se tama a Iteleti ma Kalavini e mafua mai i le 'a'ao totoo mai o le Atua i lana faamasinoga ona o ni agasala lilo a le ulugalii, ma lo la le usitai. Ae o le vaega aupito faatupu faalavelave ua sailiili nei i ni mea e faamaonia ai a latou tuua'iga, ma latou maua ai, sa fai

faaaauu itulau e sosoo ai



---

# To'a i le Taimi o le Afa

Na afatia se vaa i totonu o le Sami Atalani, ma felafoa'iina ai e le matagi ma le galu. Ae i le taimi o le malosi o le matagi ma galu e fati i luga o le vaa, na matauina ai e le kapeteni se fafine o ia faafilemuina tamaiti sa iai i luga o le vaa, i lona faamatalaina lea ia i latou o ni tala mai le Tusi Paia. Ina ua tuta le vaa ma o atu foi seila ma saisai ona maea i le uafu, na alu atu ai le kapeteni o le vaa ma fesili i le fafine sa ia faafilemuina tamaiti. "Na faapefea lava ona e to'a a o agi le afa malosi, ma sasaina le vaa e galu, ma alalaga tagata ma fetagisi foi nisi i le fefefe ona e foliga mai o le a goto le vaa i le afa?"

Na matauina e le kapeteni le tu o le fafine ma le filemu, e to'a lelei

ona uiga, ma fai mai ia te ia, "E to'alua la'u fanau teine, o le tasi o la'ua e nofo i Niu Ioka, o le isi e nofo i le lagi. Na ou iloa lelei lava ua latalata mai ona ma feiloai ma se isi o i la'ua. A goto le vaa ma

maliliu ai tagata, ma ou oti ai fo'i ma a'u, o lona uiga ma te feiloai ma la'u tama o loo nofo i le lagi. Ae a faaolatia mai i le afa ma galu fafati, o lona uiga ma te feiloai ma la'u tama o loo mau i Niu Ioka. Poo le a lava la le mea e tupu, e ma te feiloai lava ma se tasi o la'u fanau teine o faatali mai ia te a'u." *tusia e Ron Mehl,*

---

## Talitonu iai pe leai?

**O le Tusi Paia, o le tusi lea e aupito sili ona tele ona kopi e gaioi e tagata mai faleoloa ma faletusi o le lalolagi.**

**Fai mai Alesana le Sili i le tausaga e 331BC o lona tama moni o Amun le atua-o-le-la o Aikupito.**

**O le Emeperoa, poo le tupu o Roma o Caligula, na valea ma ia tofia ai lana solofanua o Incitatus e fai ma patele.**

**Sa ta'u e tagata Saina lo latou emeperoa poo le tupu, o le Atalii o le Lagi - (Son of Heaven)**

---

# IOANE KALAVINI

## O LE APOSETOLO A'OA'O ATU

Iteleti ma ava a se tagata Anapapatiso (Anabaptist). E talitonu tagata Anapapatiso o le faaipoipoga e i lalo o le pule a le lotu, o le mea lea e le tau faia ai se faaipoipoga e pei o tu ma aga e masani ai, i lalo o tulafono faalemalo. O ia fili o le 'au Kalavini ua latou fai ni tala sese fai mai na maua ni tamaiti o le po a Iteleti, a o le mea moni e sese ia tuuaiga. Ua latou tuua'ia foi Iteleti fai mai o ia o se fafine e iai ona talitonuga e ese mai i talitonuga o le lotu. O ia mea uma ua faaleagaina ai le igoa o Kalavini ona o le la nonofo ma se fafine fai mai latou, o se fafine amio leaga. O ia mea pei ua faavaivaia ai le tulaga faaleagaga ma le faatuatuaina o Kalavini.

Sa iloa foi le faaoso o ta'ifau a nei tagata e 'ai Kalavini pe a savali

ane i le ala. O le tele o taimi e salalau solo ai fualaau pala i lotoa o le falesa, e tau'ai atu e tagata le talitonu. E tele foi ina laulaututu nei tagata i fafo o le fale tapua'i ma pisa ai ina ia le mafai ai ona fai lotu a Kalavini.

O fili numera tasi o Kalavini i le aai o Sineva, o le 'au sa'oloto (libertines). O tagata e le talitonu i le saisaitia o o latou sa'olotoga aemaise lava i le itu i amioga i le va o alii ma tama'itai, poo le faitaaga. O latou ia ua latou faaliliu ma faauiga le Tala Lelei i le mea latou te manana'o latou lava iai. Ona o lo latou talitonuga faapea ua latou ola i lalo o le alofa tunoa o le Atua, o le mea lea e faitalia ai lava latou i soo se amioga latou te fai. O le toatele o latou sa matua lauiloa i le mulilua ma le faitaaga, onana ma faatupu

faalavelave ma misa. A oo i le Aso Sa, ona o atu lea i o latou fale tapuai ua faalogologo i lauga e fau i luga o mea ia latou te talitonu iai, ma ola ai, ae le o le Upu Moni. E mafai la ona tatou malamalama i le mea e le manana'o ai i mea o loo laugaina ma tala'i e Kalavini, aua e taofiofia ai lo latou saolotoga e fai ai le amio leaga ma le pi'opi'o. Fai mai foi latou o le fia pulea malosi e Kalavini o tagata. Ae le sa'o lea mau. Aua o Kalavini na tofia e le fono e toe foi atu i le aai o Sineva ma ia faatuina le lotu Porotesano. Sa fai lona totogi, e mafai foi e le fono ona tuli ma lona tulaga.

O le mea lea sa matua faitai ai le 'au sa'oloto, ona o le amiotonu sa talaiina e Kalavini, e saisaitia ai a latou amio faitaaga ma le le taupulea.

# Fai Mai e Valea ae na oo ina avea ma Foma'i

O le vevesi o lo'u mafaufau na ou toe fai ai iai pe mafai ona toe fai se isi su'esu'ega. Na lulu lona ulu ma fai mai e leai. Na ou taumafai atu lea e tau faamalamalama o Mikaele e le faaletonu lona mafaufau, e le vaivai pe "valea". Ae peisea'i e le talitonu, ma tu i luga ma fai mai, e tuu ai pea Mikaele e leai se mea o iai ona pau lava.

O le po o le aso lea, ina ua momoe Mikaele ma lona tuafafine o Lina e ono ona tausaga, ona ou tagi ai lea ma ou talanoa ia Farani i le faaaliga a le foma'i i le aso lea, ma ma lagona ai, e sili ona tele lo ma iloa o Mikaele i lo le foma'i. O le suesuega a le foma'i na fai ai le IQ Test, e moni lava, ae sili atu ona ma malamalama i le ma tama i lo faia'oga ma foma'i. E tutusa lelei lava o ma talitonuga ma lo'u to'alua e le valea, "retarded" le ma tama. E le vaivai lona mafaufau. O le mafuaaga ona o mea ma te vaavaai iai o ia faia. E pei o le tuu o le poloka i luga o lona ata, sa sa'o lelei ona fai e Mikaele.

O le tausaga e 1962 na matou siitia ai i Indiana, o ina na ulufale ai Mikaele i le A'oga Maualuga o Concordia Lutheran High School. O le maualuga o ona togi na mafua ai ona filifilia i le vaega faamasani, mo le gagana Latina, biology ma le algebra, o se tasi o mataupu na fai mai le faiaoga a o laitiiti lava Mikaele, e le mafai ona malamalama ai Mikaele. Na oo ina avea le biology ma mataupu e sili ona fiafia iai Mikaele. Ma amata ai ona fai Mikaele i tagata o ia e fia avea ma foma'i i le lumana'i.

O le tausaga e 1965 na ulufale ai Mikaele i le Iunivesite o Bloomington e amata su'esu'e ai i mataupu amata o le potu faafoma'i. E oo atu i le vaeluaga o le tausaga ua matua lelei togi o Mikaele, ma filifilia ai faapitoa e le faia'oga e na te avea mataupu e sili atu i lo mataupu e faatagaina. Ae na toe lelei ai foi i le Iunivesite lea ona togi, ma talia ai e ulufale i le Iunivesite Faafoma'i i Indianapolis.

O lona tausaga muamua i le Iunivesite lea na toe su'e ai lona IQ, ma ia maua ai togi e 126, ua 36 togi ua sili ai i le mea sa iai muamua. O se siitaga faapea e manatu saienitisi o le mafaufau e le mafai ona tupu.

I le aso o le faauuga 21 Me 1972, na matou auai atu ai o Falani, Linda ma a'u, na ou alu atu ai ma fusi mai ia Dr. Mikaele. Ina ua

mae'a le faauuga ona matou faamanatu lea ia Mikaele ma Linda le maualalo o togi o Mikaele i le su'ega mo le IQ na fai ae na o le ono ona tausaga. Ae sa faigata ona toe talitonuina lea mea. Talu mai lea aso, e masani ona vaai mai Mikaele ia matou ma 'ata'ata ma fai mai, "E le'i fai mai lava o'u matua ia te a'u e le mafai ona avea a'u ma foma'i, faato'a faamatala mai lava ia te a'u faafitauli ma mea faigata sa iai, ina ua ou pasi i le faafoma'i. Peiseai o sana faafetai lea ona o lo ma faatuatuaina o ia ma ma talitonu ia Mikaele.

Fai mai le talitonuga e masani lava ona olaina e tamaiti mea o loo lauina e o latou matua ia latou - a e lau le tamaitiiti e valea, ona amio faavalevalea ai lava lea o le tamaitiiti. Ailoga e oo ina avea Mikaele ma foma'i pe ana lau e ona matua e faavalevalea pe vaivai lona mafaufau, a o laitiiti o ia? O lona uiga e ola ai lava Mikaele ma talitonu na te le mafaia se mea leaga e valea pe vaivai lona mafaufau - "retarded"!

Faamalo i le tamaitiiti i mea na te mafai ona fai, ona tuputupu ai lea i luga lona mafai ona fai o soo se mea. Lau ma faifai e valea, ona ola ai lava lea faavalevalea.

---

## Ia I'u Lelei le Tausinioga

mai le itulaue 6  
faaolaina oe ua latalata ina e oti, ua faaolaina lava oe, ma e maua le ola e faavavau.

Ae faapefea pe afai ua e toe fo'i i le lalolagi ma le ola agasala? E mafai ona e toe taumafai i le alofa tunoa o le Atua? Ioe.

Na matua agasala le tupu o Tavita. Muamua, ua mulilua ia Patisepa. Ona fasioti tagata lea e tau ufiufi ai le la agasala ma Patisepa. Toetoe lava a sao le mea lilo a Tavita. Fai mai le 'au popoto o le Tusi Paia, e tusa o le lua tausaga ae tu'itu'itu atu Natano le perofeta i le faitoto'a ma faamatala le agasala a Tavita. Ma matua faasalaina

ai o ia. E faapea foi ona maua tatou, mai agasala lilo tatou te fai. Ma o se faailoga lava o le alofa tunoa o le Atua, le maua o tatou ae le'i oo atu i le aso faamasino. A maua tatou ia tatou agasala i lalo nei, o le avanoa lava lea mo tatou tatou te salamo ai. O le eseese lea tatou te maua ia Tavita ma Saulo. O Saulo na fe'alo'alofa'i ma leai sona salamo. O Tavita na salamo ma talia mea uma na tautala atu ai Natano. (Salamo 51). Na matua lagona lava e Tavita lona sese, ma ia faali i luma o le Atua ma Natano, ma ia tusia ai le Salamo e 51 o loo fai pea ma ta'iala i Kerisiano uma i taimi o o latou vaivaiga.

Afemata T. Apelu Aiavao

---

## *A Page for Youth*

# ITULAU MO TUPULAGA TALAVOU

---

## O le Uo Tatalo

*(O se tala mo tupulaga talavou, ma tatou uma)*

O se taeao manaia ma le lagilelei i le setete o Niu Mekiseko. O loo o'u vevesi i le faamae'aiina o fe'au o totoe a o le'i taunuu atu Harieta. E le'i umi ae tatagi mai le logo o le faitoto'a, ona ou savali atu lea ua faafeiloa'i la'u uo. Ua matua ou fialia lava aua ua tele masina ma te le'i toe feiloa'i. Ona ma nonofo lea i le potu malolo ma inu a ma kofe, ma amata lau atu ai ia Harieta o'u faafitauli - e uiga i le olaga; faapea le malepelepe o le ma 'aiga ma lo'u to'alua.

Ona talanoa mai ai lea o Harieta, ma faamatala mai se tama'i tusi o loo faamatalaina ai i se gagana faigofie le Tala Lelei o tusia e Evagelia e fa. Na o lo'u faalogologo ma le le pisa. Na o le 15 minute na talanoa ai Harieta ae ou filifili, ou te talia Keriso e fai ma o'u Faaola. Na ou lagona ifo lava i lo'u loto suiga ua ou matua fialia ai, ma pei ua ese lava lo'u tagata i lea taimi.

Na vave lava ona matauina e lo'u to'alua suiga ua ou oo iai, o'u foliga ma o'u uiga atu ia te ia. Ua vaai mai i se fafine ua matua fialia ma alofa ia ia ma le ma fanau e to'alua.

Ina ua mae'a isi talanoaga e lua ma le teine mai le a'oga a le lotu, ona faaali mai ai lea e lo'u to'alua lona fia avea fo'i o ia ma tagata o le Ekalesia, ma ia talia Iesu e avea ma ona Faaola. Fai mai lona to'alua, a o laitiiti lava o ia, sa a'oa'oina o ia i mataupu tau ia Keriso ma le salamo i agasala. I se isi a matou talosaga ma Harieta, na ia tuuina atu ai lona ola mo

Keriso, ma ia folafola o le a taumafai e faalelei le ma 'aiga malepelepe.

Na faigata ia te a'u ona talitonuina le mea ua ma oo nei iai, pe a mafaufau atu i tausaga ia e fitu ua mavae ma matua faavaatu'ia ai le ma faaipoipoga. O le ma faaipoipoga na fai i se tama'i falesa, ma e to'aitiiti lava ni tagata na iai, e foliga le fialia ma le malilie pei e mumusu i le ma faaipoipoga. O le mafuaaga e le taumate, ona e na o le ta'i sefulu ma le valu o ma tausaga, ae o lea ua 'ou ma'i i le ma tama muamua, ae o lea faato'a ma faaipoipo.

Na amata nonofo lo ma 'aiga i se potu maototogi i tafatafa o le Iunivesite e a'oga ai lo'u to'alua. Sa ou galue o se lomitusi ia maua ai se tupe e faaagaga mo le fanau mai o le ma tama. E le'i umi ae ou fanau, ua faaopopo mai ai nei isi avega mamafa o le tausiga o le pepe, ma le faigaluega e saili ai se tupe mo le 'aiga. Ua tasi nei lo ma faamoemoe, ia i'u mai i le Iunivesite, saili se galuega a lo'u to'alua, sa'ili ai lea o ni tupe se tele ma ma fialia ai.

Ae fa masina mulimuli ane, o loo tumau pea lo ma faamoemoe, ae ma tete'a. Ua matua faigata le olaga. Ua le tumau so ma fialia i lo ma aiga faaipoipo, ma le isi faafitauli, o lea ua ou toe ma'i i le ma tama lona lua. Ona amata fuafua ai lea o le a tatala le ma faaipoipoga.

Peita'i, ua lata lava ina ou fanau, ae fai le ma filifiliga, toe tuu tasi lava se avanoa e toe faalelei ai lo ma aiga. Te'a tausaga e lua talu lea filifiliga, o loo tumau pea le faaletonu o lo ma aiga.

Ae taunuu atu loa Harieta muamua lea e faamatala i le amataga o le tala!

O ni nai masina talu ona ou talia Iesu i le salamo, e fai ma o'u

Faaola, ae siitia lo ma aiga i Texas i sana galuega fou. Ua ma talitonu nei o le ma amataga fou lea. Na vave lava ona ma auai i sauniga a se aulotu lata ane. Ma te le'i manana'o lava e iloa e se isi faigata na ma ui mai ai. Ma te le'i toe fia tepa foi i tua.

Na fai se sauniga faafouina a le matou aulotu. Na auai mai nisi e toatele i Texas ma fai a latou molimau e uiga i le faamaoni o le Atua, ma lona faamaloloina o faaipoipoga ma faamoemoega malepelepe. Na lu'itauina ma'ua. Na ma iloa ai foi, e le na o ma'ua e iai faafitauli faaulugalii.

I le faaiuga o le sauniga faafouina, na fautuaina ai matou e matou te tatalo faaulugalii. E matou te ulufale atu i le malumalu, e pogisa, ae na o le tasi lava le moli o ola, o loo faamalalaina ai le satauro o tautau ifo i le mea e tutu ai le aufaipese. Leai lava se pisa poo se mea e pa'o i totonu o le malumalu.

A o matou tootuli ifo e tatalo, ae alu atu se tamaloa ua tootuli ifo i lo ma va ma lo'u to'alua, ma tuu ona lima i luga o o ma tau'au. Ma amata ona tatalo ma ta'u le tele o a ma mea lilo e le'i iloa lava e se isi - o le malepe o le ma 'aiga, o mea e masiasi ai i lo ma olaga, o a ma tamaiti, ma lo ma lumana'i. Na faai'u lana tatalo i le fautua mai lea ia ma'ua e tuu uma a ma avega i le tafu'e o le satauro o Keriso, ma talitonu i le Atua i soo se mea. Na ia talosaga foi i le Agaga Pa'ia na te ta'ita'iina ma'ua, ma faatumuina ma'ua i lona alofa ina ia ma ola manumalo ai. E le galo ia te a'u lana folafolaga o le a lelei lo ma olaga atoa, ma faatumauina ia Keriso.

"E faapefea ona ia iloa nei mea e tele e uiga ia ma'ua? Ma te le'i ta'ua lava nei mea e tele i le sauniga faafouina!"

Na ma tutu i luga ma te faafetai i le tagata e uiga i lana tatalo mo ma'ua, ma le ma fia vaai iai poo ai ia. Ae leai se isi! Ua leai lava ma se tagata i totonu o le malumalu atoa! Ua tuufua!

I lenei tausaga, ua faamanatu le 35 tausaga o le ma ulugalii faaipoipo. Faamanatu ai ma le tagata na auai atu i le faafouina, ae ma te le iloa po ai.

tusia e Judy Hampton,  
faamatalaina e  
Afemata T. Apelu Aiavao

---

O le Mafuaaga o le Pese:

# O God, Our Help In Ages Past

*Le Alii e, ua fai oe ma mea matou te nonofo ai i lea tupulaga ma lea tupulaga. A o le'i fanaua mai mauga, e lei faia foi e oe le lalolagi ma le atu laulau, o le Atua oe mai le vavau e oo i le faavavau.*  
*Salamo 90:1,2.*

O le tagata magafagafa e le mama ia te ia le amataga o le tausaga fou. E mafaufau o ia pe o a ana fuafuaga o le a faia mo le tausaga fou; ni mea sa faaletonu i le tausaga tuai ia fo'ia; ae faataatia ni matati'a e tausini iai i le tausaga fou, ia ausia, ma maua ai ni suiga lelei mo le olaga aga'i i luma.

O le mea lilo tau i taimi ma aso, o le manatu autu lea o le pese lenei, o loo faavae i le Salamo e 90. E matua toatele lava tagata ua manatu o se tasi lenei o pese aupito sili ona lelei ma logoitino ua tusia e se isi, ma e le taumate e sili atu ona logo lelei i pese uma e 600 na tusia e Isaac Watts, le tagata lea e masani ona ta'u o le tama o pese ma viiga o le Atua, na fai e tagata Egelani.

O loo laititi lava Isaac Watts ae amata ona iloa e tagata lona lelei i le tusitusi solo, poems. O le vai taimi foi lea na amata ai ona ia faitioina le faatulagaina o pese ma o latou fati, i sauniga lotu i aulotu i totonu o Egelani. Na faitioina foi e ia le faaaogaina o ni upu e le tusa ai ma le Afioga a le Atua. O lona manatu o se upu vale lea i le Atua. O lona tama na fai i ai, "Afai o lena, tago la e tusi ni pese e lelei atu e tatou te usuina." Ona faasaga atu loa lea

o Isaac ua fai fati malie mo Salamo ma isi pese o masani ona usuina i sauniga lotu i ia vai taimi.

O talavou lava o ia, 25 ona tausaga, ae ia lomia sa na tusi pese na faaigoaina o le "O Salamo a Tavita i le Gagana a le Feagaiga Fou". ("The Psalms of David in the Language of the New Testament"). E le gata i le

viiga lenei "O God, Our Help In Ages Past", a o nisi foi viiga o loo lauiloa pea i nei aso, e iai le pese: "Joy to the World" (Salamo 98), ma le "Jesus Shall Reign" (Salamo 72).

Ua silia nei i le 250 tausaga talu ona tusia pese a Isaac Watts, a o loo latou faamanatu mai pea ia i tatou le faamaoni o le Atua i ana folafolaga na faia ia i tatou, ma o le a faapea lava ona faamaoni o ia ia i tatou i tausaga oi lumana'i.

## O God, Our Help In Ages Past

O God, our help in ages past, our hope for years to come,  
our shelter from the stormy blast, and our eternal home.

Under the shadow of Thy throne still may we dwell secure;  
sufficient in Thine arm alone, and our defence is sure.

Before the hill in order stood or earth received her frame,  
from everlasting Thou art God, to endless years the same.

Time, like an ever-rolling stream, bears all its sons away;  
they fly, forgotten, as a dream dies at the opening day.

O God, our help in ages past, our hope for years to come,  
be Thou our guide while life shall last, and our eternal home.

Salamo 90:

Le Alii e, ua fai oe ma mea matou te nonofo ai i lea tupulaga ma lea tupulaga. A o lei fanaua mai mauga, e le'i faia foi e oe le lalolagi ma le atu laulau, o le Atua oe mai le vavau e oo i le faavavau. Ua e liua tagata ia momomo; ma e fetalai mai, o outou na le fanauga a tagata ia liu outou; aua e tusa i o'u luma le afe o tausaga ma le aso ananafi ina o mavae atu, ma se leoleoga i le po. O tausaga o matou olaga e fitugafulu ia tausaga; ae afai e valugafulu tausaga ona o le malosi, a o lo latou malosi o iai le tiga ma le puapuaga; aua e vave ona mavae atu ia, ma matou lele ese.....Ia faapea ona e a'oa'o mai ia i matou e faitauina o matou aso, ina ia maua ai le poto i o matou lotu.

- 
1. O le malamalama o le masina e 1.25 sekone faato'a taunuu mai i le lalolagi.
  2. E leai se leo e lagona i le masina, aua e leai se 'ea na te tau'aveina se leo poo se pa'o.

# FAILAUGA I LE SULU SAMOA 2016

	SUAFA	AULOTU	MATAGALUEGA	MASINA
1	Iosefa M. Papalii FS	Long Beach	AMERIKA	Ianuari
2	Tinetali Gafa FS	Kalihi Honolulu	HAWAII	Fepuari
3	Uikirifi Vaifale Fs	Rootyhill	NIUSAUELESE	Mati
4	Fiaaluae Tiata FS	Meadow Height	VITORIA	Aperila
5	Isamaeli Liaina FS	Logan East	KUINISELANI I SAUTE	Me
6	Petaia Tuifao FS	Drewvale	KUINISELANI	Iuni
7	Vaegaau Liko FS	Upper Hutt	NIU SILA I SAUTE	Iulai
8	Taihia Hasini FS	Tokoroa	MANUKAU	Aokuso
9	Tafesilafai Lavasii FS	Titirangi	AUKILANI	Setema
10	Ieti Tofaeono FS	Sauano	APIA I SASA'E	Oketopa
11	Faasalafa Vitaoa FS	Vailima	APIA	Novema
12	Apisaloma Aiono FS	Aleisa Sasa'e	FALEATA	Tesema

Fa'amolemole silasila ane i le fa'asologa o lo o fa'apipi'iina atu mo le masina ua atofaina mo lau susuga. Ia fa'ao'o mai lau lauga i le Ofisa o le Sulu Samoa poo le Ofisa o le Failautusi Aoao, ao toe lua vaiaso o lumanai ai le masina e te lauga ai. Ma le faaaloalo lava. Faafetai.

## **Nobody knows the trouble I've seen; nobody knows but Jesus**

“Le Alii e, ua e faafogaina le manao o e ua puapuagatia; e faamauina e oe o latou loto, ua liliu mai iai ou fofoga; ina ia faamasino i e ua matuaoti ma le ua faasauaina; ina ia le toe faamata'u mai le tagata ua tupu mai le eleele.” - Salamo 10:17-18.”

Fai mai le pese lauiloa a tagata uli o Amerika: “Nobody knows the trouble I've seen; nobody knows but Jesus.” O le ute lava lea o le Salamo e 10:12-18, ma le fe'au o loo aumai ai. O loo tautala le fai Salamo mo e matitiva, fia maua se

fesoasoani, o e ua matuaoti, o e ua sauaina. O nei tagata ua talitonu latou ua tuulafoa'iina latou e le nuu, ma e moni lava lo latou talitonuga. Peitai o loo silafia e le Atua mea uma.

Ae faapefea tagata o loo sauaina nei tagata? E le taumate e fai ane i latou, “E le faamasinoina tatou e le Atua i ia mea.” Salamo 10:13: Se a le mea ua inoino ai i le Atua le ua amio leaga? Ua fai ifo i lona loto, e te le su'esu'ea. Peitai o loo faamatala e le Salamo leni le mea moni; e silafia e le Atua mea uma o tutupu. Salamo 10:17,18: “Le Alii e, ua e faafogaina le mana'o o e ua puapuagatia; e faamauina e oe o latou loto, ua liliu mai iai ou fofoga; ina ia faamasino i le ua

matua oti ma le ua faasauaina....”

E tele lava ina tatou uiui mamao ane i le isi itu o le ala ma tatou le amana'ia le tagi mai a e ua puapuagatia, ma pei ai tatou o le Sa Levi na ia le amana'ia le tigaina o le tagata i autafa o le ala, se'i vagana ai le Samaria Agalelei, ua afe ma fesoasoani iai. O le mea na fai e le Samaria Agalelei, o le mea lava lea e finagalo lo tatou Alii Faaola tatou te fai i e mafatia ma sauaina.

E le aoga lo tatou mapo mamalu ma faailoga tagata. Faano'uno'u ifo lo tatou tagata mamalu e fulufulu vae o le tagata mafatia, fia 'ai, ma'i, leai se 'aiga. O le finagalo lena o Iesu.

---

# O E UA MALILIU

## **Toluaiava Natoealofa Utumapu-Tiotio 27 Ianuari 1940-2 Aokuso 2015**

O se tasi o tina matua o lenei aulotu fou. O le faletua o le tiakono ia Malolo Tiotio Vaepule o Vaisala, ua maliliu. O ia ma nai ona alo, Posala Seleni Tiotio FS, Peseta Afoa Arasi Tiotio TK, Polataivao Manutagi Tiotio TEK; ma iswi ua le mafai ona taua ona o le toatele na'ua o fanau e faaswino i lenei loomatua, o i latou uma o faapogai o ni matafale faavae se tolu, sa taulamua ma nisi o aiga i le amataina o lenei aulotu i le aso 4 Novema 2012.

O se tina sa faamanuiaina i meaalofa e tele a le Atua swa foaiina ia te ia; o le faamaoni, o le alofa, e to' lona loto, e faatuatua ma mata'u i lona Atua, ae tau nei meaalofa uma i le poto ma le atamai sa ia te ia. O le poto ma le atamai lea, sa faafeao i lona olaga faautauta ma le to'afimalie, ma foliga ai lona soifuaga faa-tina i lona loto-i-fale faale-aiga, o ia o le foepule ma le la-fala i le faafoeina o lona aiga, i si ona toalua faapea lana fanau pele. O se tina sa mamao lana vaai mai lava i ulua'i taimi sa tau amata ai lo la aiga i Vaisala. O le mafuaaga lea sa ia tausaina ai le tele o faigata, ma le lavelave o le vaofilifili o le olaga tauivi aua le atiina'eina o mea nei o aiga; ina ia ausia e ia ma si ona aiga le faaeaina i le lumana'i. Sa galue ma le faamaoni e tapu'e le ola faale-agaga o si ana fanau, ma lona talitonuga maumaututu, pau a lea o le ala e manuia ai lana fanau. E moni ai upu a le Poto i lana Salamo 127:3-4: "Faauta, o le fanau o le tofi lea mai le Alii; o e ua fanau mai, o le tau lea mai ia te

ia. E pei o ufanafana i le lima o le toa, e faapea lava atalii o taulelea."

Ua tauia galuega lelei ma le taua sa fitaituga ai lenei tina mo si anas fanau. Sa ia a'oa'o ma faatonu i lana fanau ina ia avea ma u e fana lava ma tu tonu i le mea sa faananau iai lona loto. E le tau faailoaina i lenei molimau galuega mauululuga a le Malo ua seei mai ai lana fanau e avea ma faaululuga (CEO ma ACEO) o nisi o Matagaluega a le Malo. Ua au lona gafa i ala i se tasi o ona alo tama ua fai nei ma ana lupe faalele mo lona Alii o Iesu ma lana Tala Lelei. E to'a sefulutasi ona alo, to'afa alo tamaitai, toa fitu tama. E toalua ua maliliu, ae 22 fanau a lana fanau. O se tina ua faamanuiaina i le toatele o i latou e tutupu mai ai.

O ona toe sauniga sa faia lea i lo matou Fale Tapuai, Aso Lulu 12 Aokuso 2015 i le itula e 10 i le taeao. Sa faatumulia aiga, uo ma aumeamamae ma lenei aulotu i ona toe sauniga. Sa auai le Ao Mamalu o le Malo ma lana Masiofo, o nisi o Minisita, le Fofoga Fetalai o le Maota ma nisi o faipule. Sa auai foi le Taitaifono o le Fono Tele, Susuga Tavita Roma FT, ma le toatele o le aufaigaluega ma o latou faletua.

O Tanielu Apineru FT sa ta'ita'i, o le Faafeagaiga a lona aiga ma lona nuu moni i Safotu. O Kirisimasi Leausa FS, Faafeagaiga EFKS i Vaisala, sa faaulufaleina lona sa ma faitauina le Tusi Paia. O Enefatu Lesa FS, Faafeagaiga EFKS Tanoa-le-I'a, sa nafa ma le faia o talosaga. Sa tofu lava i matou faifeau o ta'ua ma le molimau sa faia mo lenei tina, ona o faifeau o loo ta'ua ma a latou aulotu, o loo faaauauina ai pea ona faia ni monotaga faale-lotu (matafale) a lana fanau, ma e tele tausaga sa

lotu ai ma lenei tina. O Taule'ale'ausumai Aumalaga Tiotio, le alii loia, sa molimau mo le fanau. O au sa lauga ma ta'ita'ia le sauniga i lona oliolisaga tumau i lona fanua ma lona maota i Nuufou, Falelauniu III.

Ona o matou famavae atu lea ia te ia i le pese a le 'Au Kerisiano, Talofa uso e, tofaina oe! Tofa! Tofa! Faafetai tele tina mo lou ao taua sa tuuina mai e ala i fautuaga ma timaiga mo le faaatinoina o le galuega. Ia manuia lau malaga. O lau faifeau -

Letaulau Poufa Pesaleli FS,  
EFKS Nu-u-Faleata.

---

## **Leautuli Tuamanu Tavita**

**24 Novema 1978-12 Aokuso 2015**

E talavou lona soifua ma ua i le ooga o le asaina o le tausoosoga o lona malosi ma le ola talavou o le soifuaga nei, ae paga lea, ua valaau lona Matai e faamanavaina ana feau. O ia ma le latou matafale ma nai ona uso, ma nai ona tuafafine, o le isi matafale faavae o lenei aulotu fou. Ua maliliu uma nai o latou matua ma o loo lagomau i lo latou aiga ma lo latou nuu i Salelavalu, Savaii. A ua faatau lo latou fasi fanua kuata eka i Vaitele-Fou ma faamautu uma ai i latou ona o a latou galuega ma aoga.

Faafetai i le Atua ia i latou uma sa faama'ite mea mo le vave ona faia o se lotu i Nu-u-Fou, Falelauniu nei, ona e matou te o mai e saili nisi e amataina le lotu, ua aga'i lenei fanau i le Tapuaiga Faa-Penetekoso. Sa vave lavsa ona oposi mai Leautuli ma nai ona tei i le tau faamaopoopoina o a matou  
*faaauau itulau e sosoo ai*

---

# O E UA MALILIU

## Leautuli Tuamanu Tavita

tapenaga uma mo le amataina o se lotu, o le faamamaina o le fanua, o a'oga pese ma le tele a o isi mea.

Sa amata le lotu le lotu i le aso 4 Novema 2012, ma o ia foi sa ofo mai ina ia avea ma faiaogaa Aso Sa, o le uluai ta'ita'i foi o le matou Autalavou ma, faato'a faamavae ma ia tofiga ia Ianuari 2015, ina ua ia iloaina, ua iai le toatele o isi tagata ma o latou agavaa e tauaveina ia galuega, ae see faatuagalu ia e faamaopoopo mai i tua.

E talavou lonasoifua, a o se tagata lava ina faamaopoo mea o le lotu i ona itu uma. Ou te talitonu ma le faatuatua, o le faaswinoga lea a nai o latou matua ia i latou,

aua o se aiga e mafuta i le Atua i tatalo. E tautua lotu ma to'aga e fai mea o le lotu, e tusa o molimau a nai ona tuafafine. Ua alaga tatau ai la ma onomea ia te ia upu a le agelu wsa fai ia Konelio, le taitai'au, o ia o se tagaa amio Atua ma matau i le Atua atoa ma lona aiga uma. (Galuega 10:1-4). "Konelio e, ua o a'e au tatalo ma au meaalofa o fai ma faamanatuga i luma o le Atua." E manatua e le Atua le tagata ma ana mea sa fai aemaise o le matau ma le fai meaalofa i tagata ma lana Ekalesia.

Ua malii Leautuli, ae tuua si ona faletua ia Ruth ma si a la tama teine e toatasi ia Merina, faatoa ono ona tausaga. Ae o loo faaauauina pea e nai ona tuafafine ma nai ona uso laiti le latou matafale.

O ona toe sauniga safai lea i le matou Fale Tapuai i le Aso Gafua,

24 Aokuso 2015, i le itula e 10.00 i le taeao. O au sa taitai ma faia lona molimau faaleagaga, atoa ai ma le ta'ita'iina o le sauniga i lona oliolisaga tumau i lo latou fanua i Vaitele-fou. O si ona tuafafine matua ia Mase Seve Temukisa Tavita, le o loo tausia le aiga i Salelavalu, sa fai ma sui o le fanau e faia le latou molimau. O Posala S. Tiotio FS, sa faaulufaleina lona sa, faitauina le Tusi Paia ma faia le upu famafanafana, a o Afatia Niue Afualo FS, sa tatalo. E manatua pea oe le uso ma au galuega lelei. Amuia lava oe, uae ulufale atu i lena malologa tumau, ma ua e mapu atu i aao o le Alofa Tunoa o lo tatou Matai.

Letaulau Poufa Pesaleli FS,  
EFKS, Nuu-Faleata.

---

## Naomi Lovena Kolise Vaa

14 Oketopa 1962-26 Tesema 2014

Matua: Tama: Salu Fiso (Matautu Falelatai)

Tina: Susana Tufaina Meafou (Saoluafata ma Apia)

Tama Tausi: Sufali Foutanu (Saoluafata)

Faaiipoipo ma Saifiti Kolise Vaa o Saoluafata i le aso 23 Setema 1982. E to'alima le la fanau, ma fanau a fanau e to'afa. Na avea ma tiakono i Saoluafata i le tausaga e 1998.

Na oso faafuase'i lona gasegase i le aiga ma sii atu i le falema'i i Motootua, ma malii ai i le taeao lava lea, 26 o Tesema 2014, ae faato'a uma le Kerisimasi. Na faate'ia le matou aulotu ona o leni tala faanoanoa. Aua o se faletua e to'aga i mea e fai a le Ekalesia. E

fiafia i sauniga lotu. O Tofiga Faa-Pulega ma Matagaluega. E faamaopoopo foi i le Mafutaga a Tina. E fiafia foi i le aufaipese.

O se faletua fai fanau. E tausaaia ona uiga ma loto alofa. O ona toe sauniga sa faia i Saoluafata 12 Ianuari 2015. O au lava sa ta'ita'i. O le Susuga ia Roma Enosa sa lauga, o le Susuga Sula Malaga na tatalo, faitau Tusi Paia le A'oa'o I'u mai Malua, o Petelo Puga, ae aumai i totonu o le malumalu e le Susuga Peni Liva FS.

---

## Mosololo Tupa'imatuna Semisi Savaise Vaai Tuigamala

17 Oketopa 1934-28 Tesema 2014.

Na soifua mai le tiakono o Mosololo i le aso 17 Oketopa 1934 i le afioaga o Saanapu i Samoa. Na malii i le Aso Sa Tesema 2014 i le

O sauniga toatele, sa auai lana aufaigaluega o le Bureau of Statistics. Sa fai le latou molimau; na molimau Limuaa-Vaa o le ulumatua o le fanau, faapea foi se tasi o ona tuagane mai Falelatai, o Sala Fiso. Molimau le tama o le aiga ia Saifiti Kolise Vaa ae faai'u i le molimau a le faifeau.

Manuia lau malaga Naomi Lovena. Faamaise ia Saifiti Kolise ma le fanau aemaise le paia o aiga ma le afioaga.


Rev. Limua'a Pitoua Samuelu  
EFKS Saoluafata.

---

falema'i o Prince Charles i Brisbane Ausetalia, ona o lona gasegase tupu faafuase'i a o ia fofogaina folafolaga mo le matou aulotu i le mae'a o le tapuaiga i lea Aso Sa mulimuli o le tausaga.

O ia o le failautusi ma o le tiakono matua o le Ekalesia, na avea foi ma ta'ita'ipese galue faaauau itulau e sosoo ai

# ATA O E UA MALILIU



**Toluaiava Natoealofa  
Utumapu-Tiotio**



**Leautuli Tuamanu  
Tavita**

## **O le Foafoga a le Atua e Maofa ai.**

O le tausaga e 1974 na fai ai le sailiga a saienitisi pe iai ni meaola i isi paneta, ma latou faa'emoina atu ai se fe'au faauaealesi i nisi o ia paneta.

E 25,000 tausaga faato'a taunuu lea fe'au; ae a tali mai, e 50,000 tausaga faato'a taunuu mai se tali ona o le mamao tele o ia paneta.



**Mosololo Tupa'imatuna  
Semisi Savaise Vaai  
Tuigamala**

**17 Oketopa 1934-28 Tesema 2014.**

malosi o le aufaipese. Ua 80 tausaga ma masina e lua lona soifua. E to'a 10 o la alo ma lona faletua o Fagu Vaai Tuigamala, ma fanau a fanau e to'a 28.

O se tiakono e faaloalo ma tausi faifeau tele, to'aga i le lotu ma le faamaopoopoina o le galuega a le Atua. E fiafia e taulamua ma finau mo le lelei aua le atina'eina o le galuega a le Atua. Ua matua lava lona soifua ae le faavaivai ai i le faatinoina o ona tofi ma tiute i le galuega a le Atua aemaise ai foi lona aiga. O se tama e aga malie ma tusaafia ona uiga. E toatele foi tagata e saili fesoasoani iai ona o lona loto alofa ma le fia fesoasoani i soo se tagata.

O lona sauniga faale-aiga sa faia lea i le hall a le a'oga o Deception Bay North State School i le aso 4 Ianuari 2015. Sa ta'ita'ia e le Susuga a Osa Nanai FS o le EFKS Caboolture, ma feagai ma talosaga ma isi upu faamafanafana. O a'u na faitauina le Tusi Paia ma faia le lauga. Sa toatele le fanau ma aiga na molimauina le tama i lea po. Sa molimau ai foi se tasi o tamalii o le aiga mai Samoa, le Susuga i le alii loia o Lesatele Rapi Vaai. O se sauniga na faatumulia e le toatele o tagata, o aufaipese, aiga, uo ma aumea mamae.

O ona toe sauniga sa faia i le malumalu o le Ekalesia o le Baptist Church i Deception Bay. Sa ta'ita'ia le sauniga ma faia le lauga e le Susuga Tapenaga Reupena FS, EFKS Pine Rivers, o le sa avea ma Ta'ita'i o le Pulega a o feagai le Susuga i le Toeaina o Lau'ie Lupematasila FT EFKS Northside ma le faamalologa. O a'u na faaulufaleina le sa o le alii tiakono i totonu o le malumalu ma ta'ita'ia viiga. O le Susuga Aliota Tiatia FS, o le EFKS Chermside na saunia tatalo, a o le Susugaa Taefu Lui (AF) EFKS Northside na faitauina le Tusi Paia.

O le faletua o Fagu Vaai Tuigamala, na molimau i le la mafutaga ma le alii tiakono i

tausaga e tele ma le soifua o le tama i totonu o le la aiga ma le la fanau. O le tamaitai o Fotu Cvetco-Luetger na molimau e fai ma sui o le fanau, ae faaii i lona molimau faaleagaga na ou saunia.

O a'u na feagai ma lona sauniga mulimuli i Caboolture Lawn Cemetery i Deception Bay lava. O le pese faamavae a le Au Kerisiano - Talofa uso e, tofaina oe, na matou faamavae atu ai i lenei tama e le mafai ona faagaloina.

Tofa Mosololo - Amuia oe ua valaau mai lou Matai o faapea ona e fai, i lou ola galue pea mo ia. Amuia e ua oti oi le Alii. Ia manuia tele lau malaga.

Ioane Aloalii FS,  
EFKS Morayfield,  
Kuiniselani, Ausetalia.

## **Talitonu pe Leai?**

O le meaola e aupito sili ona toatele tagata e maliliu ai, o le namu. E faitau fia selau afe tagata e maliliu ai i le tausaga.

O le malie e igoa o le tiger shark e 'ai lava soo se mea. O nisi o mea ua maua i totonu o o latou manava e iai lima o tagata, vae o tagata, atigi pa'u taavale, atigi fagu, ma 'ofumoe.